

植物名實圖考

植物名實圖考長編卷之十九

固始吳其濬著

蒙自陸應穀校刊

木類

柏

檜

松

松羅附

茯苓附

琥珀附

牡桂

箭桂

桂

天竺桂

木樨

木蘭

辛夷

杜仲

槐

黃蘗

榆

蕪荑

漆

女貞
附放蠟法

五加皮

枸杞

溲疏

蔓荊

牡荊

酸棗

白棘

棘刺花

蕤核

厚朴

秦皮

合歡

阜茨

肥阜茨

桑

附農書種桑法
秦觀蠶書

種桑秧歌

桑花

附

桑上寄生

附

巴豆

柏

本草經柏實味甘平主驚悸安五臟益氣除風濕痺久服令人潤澤美色耳目聰明不饑不老輕身延年

別錄柏實無毒療恍惚虛損吸吸歷節腰中重痛益血止汗生泰山山谷柏葉尤良柏葉味苦微溫無毒主吐血衄血痢血崩中赤白輕身益氣令人耐寒暑去濕痺生肌四時各依方面採陰乾根白皮主火灼爛瘡長毛髮陶隱居云柏葉實亦爲服餌所重服餌別有法柏處處有當以泰山爲佳並忌取塚墓上者雖四時俱有秋夏爲好其脂亦入用

柏

木類卷之十九

唐本草注柏枝節煮以釀酒主風痺歷節風燒取脂療癰疥及癩瘡良今子仁惟出陝州宜州爲勝泰山無復採者

圖經柏實生泰山山谷今處處有之而乾州者最佳三月開花九月結子候成熟收採蒸暴乾舂礪取熟仁子用其葉名側柏密州出者尤佳雖與他柏相類而其葉皆側向而生功效殊別採無時張仲景方療吐血不止者柏葉湯主之青柏葉一把乾薑三片阿膠一挺炙三味以水二升煮一升去滓別絞馬通汁一升相和合煎取一升綿濾一服盡之東山醫工亦多用側柏然云性寒止痛其方採葉入春中濕擣令極爛如泥冷水調作

膏以治大人及小兒傷湯火燒熱傳於傷處用帛子繫定三兩日瘡當斂仍滅瘢又取葉焙乾爲末與川黃連二味同煎爲汁服之以療男子婦人小兒大腹下黑血茶脚色或膿血如淀色所謂蠱痢者治之有殊效又能殺五臟蟲道家多作柏葉湯常點盆人古柏葉尤奇今益州諸葛孔明廟中有大柏木相傳是蜀世所植故人多採收以作藥其味甘香於常柏也

別說謹按陶隱居說柏忌取塚墓上者今云出乾州者最佳則乾州柏葉茂大者皆是乾陵所出他處皆無大者但取其州土所宜子實氣味豐美可也乾陵之柏異於他處其木本有文多

爲菩薩雲氣人物鳥獸狀極分明可觀有盜得一株徑尺者可
值萬錢關陝人家多以爲貴宜其子實最佳也又以其枝節燒
油膏傳惡瘡久不差有蟲者牛馬畜產有瘡疥名爲重病以傳
之三五次無不愈也

檣

詩經淇水漉漉檣楫松舟疏釋木云檣柏葉松身書作栝字禹貢曰栝榦栝柏注云栝葉松身曰栝與此一也

爾雅翼檣一名栝禹貢荊州貢栝榦栝柏榦栝也栝檣也故檣兼有栝音栝葉而松身性能耐寒其材大可爲舟及棺槨左傳稱棺有翰檣而淇水檣楫松舟也衛詩之託興以爲物各有偶檣之與松其生固已相類其剡剡而爲濟川之用則又相須使女之適異國者每如此則何有不見答者哉唯其不能然以有思歸之作是詩與泉水皆衛女所以寓其思泉水則思出同歸

異之肥泉竹竿則思出同歸同之松檜也檜今人亦謂之圓柏以別於側柏又有一種別名檜柏不甚長其枝葉乍檜乍柏一枝之間屢變人家庭宇植之以爲玩

老學菴筆記海檜有二種海檜夭矯堅瘦皆天成又有刻削盤屈而成者名土檜海檜絕難致凡人家所有大抵土檜也

農桑通訣曰檜種如松法插枝者二三月檜芽蘖動時先熟斫黃土地成畦下水飲畦一遍滲定再下水候成泥漿斫下細如小指檜枝長一尺五寸許下削成馬耳狀先以杖刺泥成孔插枝於孔中深五六寸以上栽宜稠密常澆令潤澤上搭矮棚

蔽日至冬換作煖廕次年二三月去後候樹高移栽如松柏法
洞庭陸氏曰移松杉柏檜冬至及年盡雖不帶土根亦活正月
九分活二月七分活清明後半活

避暑錄話蘇州白樂天手植檜在宅後池口光亭前余政和初
嘗見之已槁瘁高不滿二丈意非四百年物真僞未知也後爲
朱冲取獻聞槁死於道中乃以他檜易之禁中多不知又有言
華亭悟空禪師塔前檜亦唐物詔冲取之檜大不可越橋梁乃
以大舟卽華亭泛海出楚州以入汴旣行一日張帆風猛檜枝
與帆俱低昂不可制舟與人皆沒長興大雄寺陳霸先宅庭亦

有大檜中空裂爲四枝蔭半庭質如金石相傳以爲霸先所植
又欲取以獻會聞悟空檜沉海乃已賢者因物幸託以不朽然
此三檜一槁死於道一沉於海一僅以免蓋欲爲道旁樛株不
可得也

松

本草經松脂味苦溫主癰疽惡瘡頭瘍白禿疥瘙風氣安五臟除熱久服輕身不老延年一名松膏一名松肪

別錄松脂甘無毒胃中伏熱咽乾消渴及風痺死肌鍊之令白其赤者主惡痺生泰山山谷六月採松實味苦溫無毒主風痺寒氣虛羸少氣補不足九月採陰乾松葉味苦溫主風濕瘡生毛髮安五臟守中不饑延年松節溫主百節久風風虛脚痺疼痛松根白皮主辟穀不饑陶隱居云採鍊松脂法並在服食方中以桑灰汁或酒煮軟按內寒水中數十過白滑則可用其有

自流出者乃勝於鑿樹及煮用膏也其實不可多得惟葉正是斷穀所宜細切如粟以水及麴飲服之亦有陰乾擣爲屑丸服者人患惡病服此無不差比來苦脚弱人釀松節酒亦皆愈松柏皆有脂潤又凌冬不凋理爲佳物但人多輕忽近易之爾唐本草注松花名松黃拂取似蒲黃酒服身輕療病云勝皮葉及脂其子味甚甘經直云味苦非也松取枝燒其上下承取汁名瀟主馬牛瘡疥佳樹皮綠衣名艾蒨合和諸香燒之其烟團聚青白可愛也

圖經松脂生泰山山谷今處處有之其用以通明如薰陸香顯

者爲勝道人服餌或合茯苓松柏實菊花作丸皆先鍊治其法
用大釜加水置甑用白茅藉甑底又加黃砂於茅上厚寸許可
矣然後布松脂於上炊以桑薪湯減卽添熱水常令滿候松脂
盡入釜中乃出之投於冷水旣凝又蒸如此三過其白如玉然
後入藥亦可單服其實及根白皮古亦有服食法但今松實多
作果品餘不聞堪入藥其花上黃粉名松黃山人及時拂取作
湯點之甚佳但不堪停久故鮮用寄遠方書言松爲五粒字當
讀爲鬣音之誤也言每五鬣爲一葉或有兩鬣七鬣者松歲久
則實繁中原雖有然不及塞上者佳好也中品有墨條不載所

出州郡然亦出於松故附見於此

抱朴子趙瞿病癰歷年醫不差家乃齎糧弃送於山穴中瞿自怨不幸悲歎涕泣經月有仙人經穴見而哀之具問其詳瞿知其異人也叩頭自陳乞命於是仙人取囊中藥賜之教其服百餘日瘡愈顏色悅肌膚潤仙人再過視之瞿謝活命之恩乞遺其方仙人曰此是松脂山中極多汝可鍊服之長服身轉輕力百倍登危步險終日不困年百歲齒不墮髮不白夜卧常見有光明如鏡

松羅

本經松羅味苦平主噤怒邪氣止虛汗頭風女子陰寒腫痛一名女羅

別錄甘無毒療痰熱溫瘧可爲吐湯利水道生熊耳山川谷松樹上五月採陰乾陶隱居云山東甚多生雜樹上而以松上者爲真毛詩云蔦與女蘿施于松上蔦是寄生以桑上者爲真不用松上者此互有異同爾